

MAMU TSHISHKUTAMASHUTAU INNU EDUCATION

**INNU AIMITAU
INNU-AIMUN MAK
INNU-AITUN
TSHISHKUTAMATUN
KA UAUITAKANIT
NETE INNU ASSIT**

PISHIMUSS 1, 2023 PIPUNNU



Mamu
Tshishkutamashutau
Innu Education

INNU AIMITAU INNU-AIMUN MAK INNU-AITUN TSHISHKUTAMATUN KA UAUITAKANIT NETE INNU ASSIT

PISHIMUSS 1, 2023 PIPUNNU

Tshinashkumitinau

Mitshetipanat innuat tekushiniht nete katshishkutamatsheutshuapit kamamuitunanut katutakanit kie minupanipan. Anumat, mishta-nashkumakanuat anitshenat innuat ka uauitahk innu-aimunnu, innu-aitunnu kie katshishkutamatsheutshuapinu: Siska Snow, Antane Penashue, Manimat Antane kie Angel Jourdain. Shaia Davis ka petakuiakanit nete CBC kanatutakanit 2019 pipunnu. Etenitak e unitakanit innu-aimun uauitamupan. Ninan ninatutuatanit 12 kaitipiht auassat kie uinuau ka ishpitenitakunit utaimunuau. Anumat mishta-nashkumakanipan katshishkutamatsheshishkueu Ashley Jarvis ka uauitshiat auassa ka aiminiti. Anumat nashkumakanipan Pun (Paul) Rich katshi uauitshiaushut kie aiatainak nenu mamuitunnu. Nashkumakanu An Nuna ka ashuitamatshet kie ka ashushtat umenu mashinaikannu. Nashkumakanu Marlaine Jourdain ka kapiminueshiut. Mitshet auenitshenat uauitshiaushipanat, MTIE ukaitusseshima kie nete shuniau ka ut aiatainkanit. Nashkumakanuat katshishkutamatshet kie innuat ka atusseshiht ka uauitshiaushiht nete ka mamuitunanunit. Nashkumakanu Tim Jack katshi uauitak tshipa ishi-pimipanu mamuitunnu. Navarana Tretina ka akunitshet. Ninan anumat ninashkumananat uikanishimauat ka takushiniht ka minuatakau kie uinuau tshetshi aimiht, natutahk kie uauitahk etenitakau ka ishpish ishpitenitakuniht tshetshi mamu atushkatamahk kie inniimakak innu-aimun kie innu-aitun.

Ekute ka ut utshipanit shuniau nete Department of Heritage Canada, tshetshi pimipanitakanit ume innu-aimun mak innu-aitun mamuitun.



Siska Snow

Nish^u katshishkutamatshetshuapa nitshishkutamatshe innu-aimun. Utshimau katshishkutamatsheshishkueu nitatusse nete Peenam Mackenzie katshishkutamatshetshuapit. Nin nitshitshipanita innu-aimun mak innu-aituntshishkutamatun kie mishta-atushkatepan. Innu-katshishkutamatshet nuitshi-atussematiht. Kutunnu ashu nishuaush nitatupuneshi e atusseian tshishkutamatun. Ninitau-innu-aimi muk^u apu tut nitau innushtaian. Nin kau nitshishkutamatishu innu-aimun. Eku anutshish innutshishkutamatunnu katshishkutamatshet tshika ui ishpitenimitishuht tshetshi tshishkutamatshet.

Mishta-ishpitenitakuan innu-aimun

Auassat kaitipiht 4 nuash 10, nin mak Manikaten nitshishkutamuatanit. Anumat niminuate kie nishatshiatih anitshenat auassat. Nishutshiteieshkuatiht auassat ka tshishkutamukau kie tshima ashu-pimipanitakanit innu-aimun-tshishkutamatun. Eku katshi tshishtakanit Innu Tshishkutamatun Mamuitun (MTIE), neu pipuna nete minuat nitatusse. Anutshish nipakusheniten tshishkutamatun tshetshi minupanit. Nasht ishinakuannu uikanishimauat tshetshi innu-aimiht. Eku eka nasht innu-aimitau, apu tshika ut shakutaniti utauassimuaua tshetshi innu-aiminiti. Mishta-ishpitenimeuat uikanishimauat tshetshi innu-aimiaht utuassimuau.



Anitshenat ka innu-tshishkutamat auassa, eshakumitshishikaua tshipa tshishkutamueuat innu-aimunnu. Nasht atut tshi akaneshau-aimiakanut auassat. Mate, nin ka tshishkutamatshelian, apu tut natutukau auassat e akaneshau-aimitau, at peikuan eka nishtutahk innu-aimunnu.

Auassa katshishkutamashuht tshika ui nishtutamuiakanuht nenu ushkat utaimunuau innu-aimunnu. Eukuannu anumatsishpitenitakanit, apu tshika ut tshissenitakau utaimunuau eka punitatau ukaiminimuau kie umetuakanau. Auassat katshishkutamuakaniht innu-aimunnu tshika ui nitau innushtauat aiat meshinaitshetau. Eukuannuishi-tshishkutamuepan Manikatinen auassa innu-aimunnu.

Nete tshiteinat tshika ui utinenan tshitaimunnu. Tshishennuat numat ishpiitenitakuannu tshetshi kanuenitakau innu-aimunnu kie innu-aitunnu tshishkutamatunnu.

Namaieu nin ka mishta-tshissenitak tshekuannu. Nin nitinnu-aimiauht nussimat kie nuitamuaut “Eka ui atamenimiku eka nitau-innu-aimieku.” Eku anitshenat nitauassimat eka innu-aimiatu utauassimuau, namaieu nin nitatusseun. Tshika ui ushkat tshitshipanuat nasht pet e apishis-sishiht. Anitam etuteiani nete miamuitunanuti nanitam nin nuiten tshetshi tshishkutamuakanit. Namaieunnu muk^u tshetshi metueiakaniht pitakamit. Nete unuitamit innu-aitun tshishkutamatunnu tshipa tshikutamuakanuat.

Nishuaush innuat ukanumipanit e innu-aimun-tshishkutamatunnu nete pet nin ka tshitshipanian e tshishkutamatsheian. Eshakuminipiniti nnashi-tshishkutamashutan tshetshi ukanumiat kie nuitsheuatanat nitauassiminanat. Innu-aimun-tshishkutamatun nitshishkutamashutan tshetshi tshishkutamatshiht auassat katshi tshishtaiaht. Nipatshi tshishkutama tshen nete kutaka katshishkutamatsheutshuapa muk^u nin ute Sheshatshit nui tshishkutamatshe. Anitshenat ka innu-tshishkutamuahat auassa ishinakuannu tshetshi innu-aimunnu tshishkutamuakaniht. Nete katshishkutamatsheutshuapit nitute nimashinaikana e innushteti tshetshi apashtakaniti innu-aimun-tshishkutamatun, namaieute nete nitshit etutaman. Mishta-ishpiitenitamupanat auassa ka ishi-tshishkutamukau innu-aimun tshishkutamatunnu. Nete ka ut tshitapamikuiat Kapimipanitaht nete ut Napatau, at tapue apu nishtutak innu-aimunnu. Ushkat etshitshipanian e atusseian nishetshishi muk^u nanatshe apu kushtaman ne ka minikuian tshishkutamatun-atusseun.



N utim etashiak^u ishpienimitutau tshetshi uitshiakuht auassat ka tshishkutamashut. Kassinu uapatam^u auass kie tshe tshita pamikunuht. Anumat ishpienitakushuat auassat tanite nishinua utaimunuaua. Nishtam tshika ui tshisenit amuat innu-aimunnu nete utshishkutama shunuaut. Tshinan tshika ui ushkuish tuananit tshetshi tshissenitahk innu-aimun tshishkutamatunnu kie nete ka apishi-ssishiht ushkat nuash nete nisht^u ka itipihit tshipa tshi tshitshipaniakanuat e innu-aimun-tshishkutamuakaniht. Ishinakuannu tshetshi nishtam innu-aimun ishi-tshi tshipaniakaniht piatshetau katshishkutamatsheutshuapit, tanite shash tshika ui akaneshau-tshishkutamuakanuht kie mish-ta-uipat tshika itashikakuht nenu ishi-tshishkutamuakanitau akaneshau-aimunnu nishtam. Kassinu nete ishi-takuannu tshe tshi uipat katshitinak akaneshau-aimunnu mate nete atautshuapit, kaiashetshimaka niti, umetuakanuaut kie kassinu nete assit. Tshipa uauitshiakanuat auassat anitshenat eka katshi uauitshitishuht. Mate nin, nuitshia auass eka ka petak, nuetishi-nataimua akunikana nitishinakutaua uma-shinaikan, uapatam^u kie eukuan nin nitshishkutamua ne auass innu-aimunnu.

E ku numat ishpienitakuan tshetshi ishpienimituiek^u. Nin anutshish nitashinen nish^u aimuna katshi tshissenitaman kie eukuan kie uinuau auassat tshipa itenimuat. Innu-assit mak tshishennuat ishpienitakuannu tshetshi uitshiaht auassa.



ANTANE PENASHUE

N ishet mak Pien Penashue ishinikatakanipanat nikau mak nutai. Eku tshe uauitaman etenitaman tshishkutamatun. Anite nutshimit nin nikushpi-taikutit nikau mak nutai, tetaut e tshishtauakaniti ushkau-pishimua nuash pishimussa, eku minuat uinashku-pishimua, eku metapeiat uapikun-pishim^u. Uenapissish muk^u ni tshishkutamashu eshk^u eka kushpiat kie metapeiati. Eku eshit man nishtesh, “Minuau kau etshishkutamashiaku at peikuan eka nashatamak^u ne tshishkutamashun tshishtekaikan”. Mishta ishpieni takuan tshetshi eka unitshisseitamak^u ka ishinniuiak^u. Anutshish nuapamauat auassat akaneshau-aimuat kie tshikushtamuanut kie miam ne itenitakuan akaneshau-aimun eukuan nishtam aimun apashtaiak^u. Eku tshipa minuau etatu innu tshishkutamatun pitakatakanit nete katshishkutamatsheutshuapit, eik^u katshipaika nish tshipa apash-takanu innu-aimun e tshishkutamuakanit auassat. Tipatshimuna ishinakuanua tshe-tshi tshishkutamuakanit auassa eiat. Nin mate nikanueniten kanitutakanit ute innu assit kie nitipatshimun ka ishi-tipatshimushtuiht nikau kie nutai.



Minuatuamat innuat eshi-tutaman. Tshika ui tshishkutamuakanuat auassat tanite uetuteiak^u. Ekuannat anitshenat auassat tshe utshimamiak^u aianashkat. Mamu tshipa uauitshiaushiuat

Innu Nation mak Innutshimauat tshishkutamatunnu. Tshipa minuanu tshi uishamakaniht nete katshishkutamatsheutshuapit tshetshi aimiaht auassa, tshetshi uauitamuat tanite etat ka atushkuat innua, innu-utshimamitatishunnu kie nenu assi-tipenitamunnu, tanite etananut tshishe-utshimau ka natapashtatunanut, kie tan eshi-atushkatakau kutakat ka peiku-mamuitishuht nete innu assit e natapashtuat tshishe-utshimaua. Auassat kie uinuau ui tshissenitamuat tanite etanunit nete tshishe-utshimau e netshishkuakaniti. Uinuau auassat tshika uetashumitishuat tanite ua ishi-pimutet tshishtatau katshishkutamuakanit nete aianishkat.



Nin nussim akaneshau-aimu. Nishetshikuan eshinakuak^u. Eku niteniten, tshekuan tsheshkutamatshenanut nete katshishkutamatsheutshuapit? Nikasseniten. Nipa minuaten nin auassat nishtutak eshi-animiuk^u kie kuetshipanitaiak^u tshetshi minupaniak^u nete tshitinnuat anutshish. Nui uitamuuat auassat tshetshi eka nita unitshissenitahk utaimunuau innu-aimunnu, utaitunuau nete innu-aitunit kie nenu tipatshimuna innit ka utshipaniti. Nin peikuau uetshimauian nuiten kauapikuesht katat ute shashish. Iteshapan innua apu minuaten nete nutshimit tshetshi taiek^u, muk^u apu natutuakue nutau, eku nikushpitaikutan.

Tshima natutak anitshenat ka innu-tshishktamatshieht nenu tipatshimuna ka uitamuk^u kie nin nui uapaten innu-aimun mak innu-aitun tshishkutamatun.

MANIMAT ANDREW

Nishtam ninashkumauat kassinu innu-katshishkutamatshet nete Peenamini McKenzie katshishkutamatshetshuapit, miam mate Manikatenen, nimish. Apu shuka nita petamin tshetshi akaneshau-aiminanut nete katshishkutamatshetshuapit. Apu tut shuka takuak tshekuan eshi-pimipanit at mak anutshish eshinakuak nete katshishkutamatshetshuapit kie nete peikuan mitshuapit. Nin anutshish ueuikanishimauian kie ka innu-tshishkutamatshetshuapit kie nin tshe-tshi unitaiak^u innu-aimun. Passe tauat aeni-tshenat eshk^u tsheshpeuatahk innu-aimunnu.

Nin nikutshipanitan tshetshi tshishkutamatshetshuapit innu-aimun kie tetaut ante nitanitshun tanite tauat auassat e akaneshau-aimit kie e innu-aimit. Nishuait nitishpitikaun. Uikaishimauat kie uinuau tshipa uauitshiaushuat kieu- tshimauat kie ute innu-assit etaiak^u tshipa takuan uitshi-atusseumitun ute katshishkutamatshetshuapit tshetshi matinumakanit innu-aimunnu, innu-aitunnu kie tipatshimuna anitshenat auassat.



Peikuuau nita nete mamuitunanuipan, eku ninan innuat nitinnu-aimitan kie nikue tshimikaunan ne kukuminash tan eshi-aimiek^u nitikunan.

Nimishkatenimikaunan kie nimushtenishitikaunan katshi petuimit nenu innu-aimitutshit. Nitikunan, "Shuka tshinuau tutamuk^u tshetshi inniuimakak tshitaimunuau. Eku nenu uin utinnima, shash unitanishapani utaimunuau."



AUASSAT 12 KAITIPIHT - ANGEL JOURDAIN

Eukuannat auassat uitamupanat eshpish ishpitenitakunit innu-aimunnu kie innu-aitunnu tanite innu-aitun nitshishkutamakaan anuenitshenat u ninan, eshi-minuatamat tshekuanna kie nete etaht nitshinninanat, nitanishkutapananat, kie ka shatshitshiht nikanishinanat. Unitaiaku tshitaimunnu, tshika minanut kutakat auenitshenat ka kutsh ipanitaht tshetshi tshimutamatakuht eshi-inniuiak^u kie tshika anikaunan nete auassat ka kanuenimakaniht kie ka piuenimakaniht katshishkutamatsheutshuapit. Ishinakuan tshetshi tshishkutamatshenanut innu-aimun aianishkat tshe taht kutakat auassat. Ne eshi-inniuiak^u, eukuan uapatiniuetau tshetshi nanitam innuiak^u tshinan innuat nuash nete tshe mitshet pipuak. Tan eshi-inniut auen eka takuanit utaitun. Miam ne ka unashinit auen itenitakushu.

Katshishkutamuakaniht auassat nituenitamuh tshetshi etatu innu-aitunnu tshishkutamuakaniht, etatu innu-aimunnu, etatu mishtikussitshuapit ituteiakaniht, uinuau uetshit tshetshi tutakau tshekuannu ka ishi tshishkutamuakaniht, etatu tshetshi piminuet nutshimiu-mitshiminu, kainnu-tshishkutamatsheht tshetshi mitshetiht, etatu tshetshi tutakaniti akuashkaikana e innushteti, e innu-nikamunanut, tshetshi innu-aimiakaniht nete uitshuauat, etatu tshetshi taht tshishennuat nete katshishkutamatsheutshuapit, tshetshi mitshetuau nataht auassa kaiatusseshiht nete innu-assit, tshetshi mamu uitshi-atussemitatunanuht mak tshetshi mitshetuau natipishtatunanut miam ume eshi-tutakanit anutshish kashikat.

**TAN TSHIPA
ISHI-TUTENAN
TSHETSHI
INNIUIMAKAK
INNU-AIMUN KIE
INNU-AITUN?**



SHAIA DAVIS



Nema mamitunenitamutau tshitan nete katshipanikanishit e mitshetinanut kie tshe tshinuenimauat anitshenat etat nete katshipaikanishit kie uinuau muk^u tshitshisseniten tshe eka nita tain nete uinuau etat, e mamuitut, e nishtutatut, tshitakuai kun nete tshiteit kie miam tipan etaini tshit-ishi-utinen nete tshikanishat. Nin innushkuess muk^u nitakaneshau-aimin, nitshisseniten eteni-takuak. Tshishennuat kataht ute innu-assit mishta-apishish muk^u akaneshau-aimuat. Eukuan etenitakuak miam e tetaupanit ne e akaneshau-aiminanut muk^u. Mate ne nukum e kukuminashiut mishta-tshissenitam^u assinu, eukuannu ka utshi-inniuiaku ne eshi-inniuiaku. Mamitunenitamatauat auassat eka ka tshissenitak innu-aimunnu kie eka takuanit tshipa ishi-nishtutata-tishuat. Unitaiaku ume tshitaimunnu, tshinan tshunitishunan nitshishku. Takuan pakushe-nitamun tshetshi kanuenitamak^u tshitaimunnu. Tshika ui mishta-atushkatenan tshitaimunnu.



- Innu Language & Culture
- Teach (New Arrive) Kindergarten-Grade 3
 - Train Innu speaking Teachers to teach Innu
 - Hire Innu Language Signs-Posters, Reading in Community buildings.
 - Speak more Innu to Children at
 - More Innu families to Out Post Program with their Grand Children. (Less Technology)
 - To bring back Innu Aimin before classes start.
 - Teach Innu Alphabet more often or when going Camping/Nutshim.
 - Innu Story books
 - Innu Dictionary (download APP) A Copy of Book (Innu Dictionary) at Home.
 - Innu Parenting Classes to be taught (Innu Aimin Language)

Nete mitshuapit ishinakuan tshetshi tshitshipanit: —

Mitshet auenitshenat uauitamupanat nete mitshuapit minuau tshetshi tshishkutamatishunanant innu-aimun mak innu-aitun. Nanitam tshika ui petamuat auassat e innu-aiminanunit, auass ka auassiuht uetinu tshetshi tshishkutamuakanit. Eku uikanishimauat tshipa nanitam innu-aimuat, iam mate nete e itiht miam nete e mamuitunanunit, ametaunnu nete shashish ueshkat ka ishi-inniunanunit, shipa tshishkutamatishuat tshetshi uitamuat kie uitshiat utuas-simuaua. Tshipa kushpitaieuat utuassimuaua kie ussimuaua. Tshipa shutshiteieshkueuat kie uauitshieuat utuassimuaua tshetshi innu-aiminiti, tshissenitaminiti innu kapapapeikushteshiniti kie tshishkutamatun mashinaikana ka tshiuetat auassat nete uitshuat tshetshi tutak kie tshipa kanuenitamuat uikanishimauat nenu aimun-mashinaikannu tshetshi tshishkutamuat utuassimuaua.

Uikanishimauat tshipa uitshieuat utuassimuaua tshetshi tshissenitaminiti innu-aitunnu kie ka ishinniunanut. Tshipa ishineuatsheuat nenu uinuau ka ishinniuht. Tshipa mineuat utuassimuaua tshetshi metueniti nete unuitamit ie tshipa tipaimueuat nenu umetuakanu nushtaniti nete pitakamit uitshuauaut ie nenu ukaiminanimanu mak ka atusseu-katshitapatakanit ie tshipa shitshimeuat tshetshi innu-aiminiti. Tshipa ui tshissenitamuat eshpish kushitikunit e nushtakanit ka atu sseu-katshitapatakanit kie nenu ka metuatsheutshe nete ukaishtshimakanimuaut metuakana.



Tshekuan tshipa tutakanu nete ka ut pimipanitakanit kie ka nakatuapatakanit katshishkutamatsheutshuap kie nete ut katshishkutamatsheutshuapit ?

Mitshetipanat auenitshenat issishuepanat ishinakuannu auass tshetshi etatu tshishkutamuakanit innu-aimunnu kie innu-aitunnu. Eku mitshenipani tshekuana uiauitakau tshipa ishi-tutakanu tshekuan. Passe uauitakanipan tshetshi tutakanit, innit ka utinakanit uitshiaushun tshetshi apashtakanit nete katshishkutamatsheutshuapit kie mitshuapit. Eku nenua uitshitunnu tshipa ishinakutakanua tshetshi innit nete utshipaniti, kie papeik^u nete ka ishi-tshishkutamuakaniht auassat, kie nenu etapiht tshishkutamatunnu.

Eku nenu tshishkutamatun-uitshituna tshipa ishinakutakanua e natutakanit kie e petakutakanit, miam mate: Kanuat – ka papapeikushteshiti e akunikaniiti, kie mak akunikaniit kie e innushteti aimuna, Akuashkaikana – tshishtekaikan eshi-uaitakanit kie mak kussikuashuna e akunikaniiti miam mate asham, Assiu-mashinaikan ekunikaniit kie tshetshi akuashkaikaniit nete ka tshishkutamuakanit auassat, Matshunisha kie kutaka tshekuanna tshetshi innushteti, Akaneshau-aimun-uitshitunna tshetshi innushtakaniti, Innu-aimun-mashinaikan nete ka atusseu katshitapatakanit tshetshi takuak, Innu tshishkutamatun-uitshitun tshetshi minakaniht uikanishimauat tshetshi tshishkutamuat innu-aimunnu nenua utuassimuaua ka apishissishiniti, Tshishennuat tshipa uaitshiaushiat tutakaniti nenua tshishkutamatun-uitshituna.

Uaitakanipan eshpish kushtikuaki ka aiminanuti katakunikaniti kie nenua metuakana auassat anutshish ka metuatsheutshe, mishkut takuanua kutaka etapashtakaniti ka atusseu-katshitapatakaniti kie tshipa tshi uaitshiuue e tshishkutamatishunanut innu-aimun kie tshipa tshi tutakanua innu-tshishkutamatuna kie metuakana e innushteti. Peik^u ne innu auass kaishetshimakanit (miam ne mate Innu Dora) tshipa ishinakutakanu, tshipa takuan innu-tshishkutamatun miam mate e tshimatakanit patshuianitshuap, e natunanut kie mak aitutuakanit aeshish katshi nipiakaniti. Kutak tshekuan eiat uaitakanipan anitshenat ka pimipanitat tshishkutamatunnu tshipa tutamut tshetshi akunikaniht innu-auassat tshetshi uapamitishuht nete kaishetshimakaniti.

Mitshet ishi-uaitakanipan atusseu-tshishkutamatun kie katshishkutamatshet katshishkutamuakaniht (Tshishkutamatun ka atushkatakanit). Anitshenat ka innu-tshishkutamuat auassa tshetshi etatu innu-aimunnu kie aitunnu tshipa tshishkutamuakanuht. Tshipa utinikanu peik^u tshishik^u tshetshi tshishkutamatunanut innu-aimun tshetshi innu-aiminanut nete auassat katshishkutamuakaniht. Etatu tshipa tshishkutamuakanuat anitshenat shash ka innu-aimiht ka atusseshiht. Anitshenat ka innu-tshishkutama-tsheht tshipa tshishkutamueuat akane-shau-katshishkutamatsheniti. Passe auenitshenat uaitamupanit nenu ka akaneshau-katshishkuta matsheht tshetshi tshishkutamuakaniht kie uinuau nenu innu-aitunnu kie ka ishinniuniti innua. Auassat tshipa uitshiakanut katshi tshishtatau e tshishkutamashut ute innu-assit kie tshipa uishamakanut tshishennuat tshetshi uaitshiaushiht nete innu-tshishkutamatunnu.



Uauitamupanit auenitshenat nenu eshipimipitanit tshishkutamatunu kie katshishkutamatsheniti eshi-utinakanit tshe ishi-tshishkutamuat auassa. Passe auenitshenat natauenitamuat tshetshi innu-aimunnu tshishkutamuakaniti auassa nete tshetshi tshitshipanit ne tshishkutamatun kaiapishissishiht nuash^u nish kie mak nish^u etapiht auassat. Passe kutakat auenitshenat natuenitamupanat nutim etapiht auassat tshetshi etatu innu-aimunnu tshishkutamuakaniht. Eshakum tshishikau tshipa innu-aimiakanut auassat. Etatu tshipa utinakanuat innu-aimun katshishkutamatshet, kassinu nete etapiht auassat tshipa anakanu innu-aimun katshishkutamatshet, tshipa uitshi-atussemituat akaneshau katshishkutamatshet kie innu-aimun katshishkutamatshet, mamu tshipa atusseshtueuat auassa. Ishinakuan tshetshi minu-uitshi-atussemitatunanut tshetshi minu-tshishkutamuakaniht auassat. Passe eiat auenitshenat uitaupanat tshetshi kau takuak ka nikumuiakaniht auassat, innu-aimunnu kie innu aitunnu tshipa ishi-tutakanu nenu ka nikamuiakanit tshishkutamatunnu. Kutak tshekuan ka ishi-uauitakanit tshetshi minushtakaniti innu-aimun mak innu-aitun mashinaikana, tshetshi mamushtakaniti mashinaikana ka nakatuenitakaniti katshushkutamatshetshuapit tshipa ashtakanua kie tshipa tau Innu kauauitshiaushit. Tshipa ishi-pimipitanikanu ne auass ushkat katshishkutamuakanit tshetshi innu-pimipitanikanit.

Kutaka tshekuana ishi-uauitakanipani tshetshi shatshuapatakaniti kainnu-kapimipitanikaniti innu-tshishkutamatunit ka ishi-minupanikuht, kie tshetshi mishkutikanit akaneshau-tshishkutamatun (Accelerated Second Language Acquisition).

Kutaka tshekuana ishi-uauitakanipani tshetshi aieshikutakanit kie tshishatish-



takanit. Tshishennua kie mak kainnu-tshisenitaminiti tshekuannu tshipa uishameuat peikuau peiku-pishimua tshetshi uapatiniuet innu-aitunnu. Tshipa minu-tshitapatamuat e minuanit tshishkutamatunnu. Eshakumiminashtakana kie mak eshakumipishimua tshipa uauitakanu tshe ishi-tshishkutamuakaniht auassat, kie tshipa tshitapatamuat tshekuana eka ka minupaniti kie tshe minupaniti nete tshishkutamatunit. Innu-katshishkutamatshet tshipa minitishuat tipaikannu tshetshi tutaku utatusseunnuau.

Passe auenitshenat natuenitamupanat tshetshi kau takuak innu-aimun tshishkutamatun mashinaikanitshuap, kie tshetshi peikutakanit ne katshipaikanisht. Kutakat auenitshenat issishuat nutim nete katshishkutamashunanit ekute tshipa tshishkutamuakanuat innu mak akaneshau tshishkutamatunnu. Eshakumitshishikaua tshipa innu-aiminanu nete katshishkutamatshetshuapit. Akunikana kie e petahk innu-aimunnu tshipa uitshiku auass.





Passe auenitshenat issishuepanit tshipa innu-aimieuat auassa anitshenat innuat ka atusset nete katshishkutamatsheutshuapit, kie tshipa uapataniakanu eshpish minuatakanit e innu-aimit auass. Nete katshishkutamatsheutshuapit tshipa shutshiteieshkuanuat auassat tshetshi aimiht utaimunuau kie tshipa shutshiteieshimu ne auass nenu eshi-uitshikanit tshetshi aimit utaimun. Nete katshikauanunit tshipa petakuikanuat auassat tshetshi innu-aimiht tshekuannu ua petakutakaniti kie tshipa pitepaniakanu auass katshikauenanunit aimieunnu e aimiat eshakum tshietshepaushiniti. Passe eiat auenitshenat issishuep anat tshetshi nanatu-tshissenimaniht auass eshpish katshiuht innu-aimunnu kie tshetshi mashinataikanit nete ukanumit. Kie tshipa uapataniakanu auass eshpish katshiut kie mak eshpish kutshipanitat innu-aimun kie innu-aitun-tshishkutamatunnu. Kutakinu tshekuannu tshipa ishi-nanatu-tshissenimakanu auass: -eshi-innushtat, - kie e tshiuetat umashinaikan tshetshi tutak nete uitshuat,- kie tshetshi tshissenitak nutshimiu-tshishkaikana. Passe auassat nitau ashu-uitamatsheuat nete katshishkutamuakaniht innu-aimunnu.

Auenitshenat uauitamupanat tshetshi minu-uauitakanit innu-aitun-tshishkutamatunnu: etatu tshetshi unuitakaniht auassat, kie tshetshi uitsheukut tshishennua kie mak ka tshissenitaminiti innu-aitunnu; e pimutenanut kie katak^u etanut; nutshimit e ituteiakaniht auassat (eka nasht takunakanit tshekuannu tshetshi utamikahk (miam mate ka takunikaniti ka aiminanuti); tshetshi tshishkutamuakaniht e akussenanunit mak e natunanunit, e manukashunanunit, e kussikuashunanunit kie e tipatshimunananunit. Eukuan peikuan tshipa tshi ishi-tshishkutamuakanuht auassat nete pitakamit katshishkutamatsheutshuapit. Eukuannu ua uapatahkau uikanishimauat tshetshi ishi-tutakaniti utassimuaua katshishkutamuakaniti, eshpish ishpitenitakushit aueshish, natunnu, eshi-naikuakanit aueshish, eshi-pimivanut kie etapatshikanit aueshish; tshetshi uitamuakaniht auassat innu-tapuetamun miam mate aueshish-utshimamuau kie tshetshi ishpitenimaht aueshisha; tshetshi mukutatshet kie ashamaitshet; ka ishi-inniuiht innu nete utat nuash anu-tshish tshipa tshishkutamuakanuat (ka mamishitiht auassat).

Nete katshishkutamatshuapit ishi-uaitakanipani tshipa tutakanua tshekuana miam mate: innu-aitun mak innu-aimun tshishkutamatun auassat uinuau tshetshi tshimanakanit kie mak auassat mamuitun uinuau tshetshi pimipanitat, kie tshetshi tshishkutamuakaniht utshimaun-atusseunnu; tshetshi utinakanit ka minuatakanit tshishik^u, auassat tshetshi mamuituht, kie tshetshi takushiniht uikanishimauat nete katshishkutamatshuapit; innu tshetshi aiatinak auassa ka nipaamieu-nikumuiakaniti; auassat ka mamishishtih tshetshi uinuau minakaniht peiku-tshishikunu tshetshi tshishkutamatshet; auassat tshetshi uitshiat uitshi-auassuaua e tshitapakanit mashinaikannu ka innushtenit; nete kanatutakanit tshetshi petakutakanit tshekuan e tutakaniti anite katshishkutamatshuapit. Innu tshetshi pimipanitat innu-aitun-tshishikunu. Auassat tshetshi tutakau aimunnu tshetshi apashtaht nete mietuetau mamu kutaka katshishkutamatshuapa ka natshi-metuet ute innu-assit.



Ekua nenua kutaka tshekuana uaitakanipani anitshenat akaneshau-katshishkutamatshet. Tshipa etatu tshishkutamuakanuat innua utinniunnu; tshipa innunakutakanu nete ukatshipaikanishimauat tsheshkutamatshet miam mate akunikana, akuashkaikana; kie tshipa minu-uitshi-atussemituat innu-katshishkutamatsheniti. Nete miamuitunanuti miam mate Tshiashkuaishit tshipa ituteuat. Tshipa tshishkutamuakanuat innu-aimunnu, tshetshi nishtuat kie aimiat auassa, kie tshipa shutshiteieshkueuat kie uinuau nenu auassa tshetshi innu-aiminiti nete katshishkutamuat.

Innu-assit utshimauat kie kutakat auenitshenat ka peiku-pimipanitishut atusseunit



Auenitshenat uauitamupanat tshipa ishitutakanu mamu tshetshi uitshitunanut ne ua ishi-pimutakanit innu-tshishkutamatun nete innu-assit tshetshi innu aimitunanut. Uinuau innuat tshipa tshi tshitshipanuat e innu-aimiht, issishuepanat auassat katshishkutamuakaniht. Namaieu nete muk^u katshishkutamatsheutshuapit tshetshi tshishkutamuakanit auassat innu-aimunnu kie innu-aitunnu. Nanitam tshipa takuannu auass tshetshi innu-aimiakanit. Nete innu-assit tshipa utshipanu tshetshi ut mishkakanit auassat tshetshi tshiuenuimat tshishennua aimikutau. Tshipa minu-uitshi-atussemitunanu tshetshi kanuenitakanit innu-aimun kie innu-aitun tshetshi minu-inniumakak.



14 Innu Aimitau: Innu-aimun mak innu-aitun

